



**Inatsisartut aalajangiiffigisassaattut siunnersuut Naalackersuisut peqquneqassasut Naalagaaffiup akisussaasuinut atassuteqartoqarnissaanik Kalaallit Nunaanni Pinerluttulerinermut inatsimmi paragraffimik ikkussisoqassasoq, nittartakkatigut atornerluinerup inatsisitigut unioqqutitsinertut isigineqarnissaanut. Atassuteqarneq UPA 2022 pinnginnerani pisimassaaq.**

(Inatsisartunut ilaasortaq Anna Wangenheim, Demokraatit)  
(Siullermeerneqarnera)

Siunnersuummut tapersersornartumut Demokraatit Inatsisartuni ilaasortaataitaannut Anna Wangenheimimut qujanaq.

Ajoraluartumik qularutissaangilaq, maani nunatsinni suli ajornartorsiuteqaqisugut meeqqat tamarmik pitsaasumik toqqissimasumillu meeraanissaat qulakkeerniarlugu. Meeqqanik naapertuilluannngitsuliernerit suli nunatsinni amerlavallaarput. Demokraatinut pingaartuuvoq, sapinngisarput tamaat tamanna mumisinniassagipput.

Pingaartuuvorlu qulakkiissallugu, inatsisip nutartertuarnissaa, inuit naapertuilluannngitsuliortut sakkortunerpaamik pineqaatissinneqarnissaat periarfissinniarlugu.

Internetip inuillu naapeqatigiittarfiisa atugaagaluttuinnarnerisa pinerluttut nutaamik iliuusissaqalersippaat naapertuilluannngitsuliornissaannut tassalu qarasaasiakkut atornerluinerumut. Tassa imaappoq, inuk inersimasup ajortumik isumallip meeraq tatiginnilersinniartarlugu meeqqamut kinguaassiuutitigut atornerluinissaq siunertarlugu. Imaluunniit imannak, meeraq qanillisarlugu atisaqarani assiganik nassiussisinniarsarlugu imaluunniit assinik allanik atoqatigiinnermut tunngassuteqarsinnaasunik atornerluisumut nassiussisinniarsarlugu.

Pissutsit tamakku akuerineqarsinnaanngilluinnartut suna tamaat atorlugu pinaveersaartinniarsarissavagut, Demokraatinullu pingaartuuvoq, ersarissumik Pinerluttulerinermut inatsimmi allassimalissasoq, inatsisinik unioqqutitsinerusoq, kialluunniit qularutigissanngimmagu, qarasaasiakkut atornerluineq pillaatissinneqarnermik kinguneqarsinnaasoq.

Iluarisimaarparput, Naalackersuisut siunnersuut tapersersormassuk, neriuppugullu, partiit allat maani Inatsisartuni aamma taamaaliorumaartut.

Siunnersuut Inatsisinut Ataatsimiititaliamut suliareqqitassanngorlugu innersuunneqarpoq.